



平齋文集卷第八

詩七

觀物二首

飽飯茶甌罷閑觀萬物情  
狗加獅立號猫冒虎爲  
名故沼慈姑王新畦腐婢榮  
蟬從何許變忽送出  
林聲

薄命天元定深居日轉長  
塔鈴空洛度車鐸慣琅  
璫筍長竹還老蓮遲荷自香  
羨他雛又乳雙燕勝  
春忙

抹利

翡翠簾帷雪透肌  
纖風不動鬧香吹  
裴回顧影精

神發省得京華識面時

晚蓮

颯然秋入井梧嘶  
窻下紅蕖始脫泥  
但有意開何  
論晚縱無力  
上不嫌低魚貪芳影  
機還熟蝶怕深  
香路自迷更把閑情  
堅耐着明年花與屋  
簷齊

涼月二絕

蓮房折盡只留荷  
露蓋班班一丈過  
高下橫斜無  
定影聚涼着得月  
明多  
金粟安排雨後黃  
定知花亦愛新涼  
夜深月透玲瓏影  
花自光明月自香

挽阮倅

膠庠推博洽  
州縣著廉平  
人物萬夫特  
山川千古英  
虬髯橫意氣  
猿臂鬱功名  
一掬同年淚  
西風浩蕩情

挽李丞

篤敬古君子  
公平賢大夫  
筆端知已有  
券外得心無  
落日搖墻竹  
淒風墮井梧  
蓄深施不盡  
留與讀書符

和子有催歸

卜廬必擇地  
買鄰不論金  
出機與入機  
去心即來心  
拗性臨川翁  
罷相老境侵  
霜竹鍾山寺  
雅寄金玉音  
強項峨眉眉  
僊渡海憂患  
深把程陽羨  
田歡言

飽甘霖故山月在眼客屋風蒲襟欲歸欠生業隨  
寓如家林覓榿適閑趣借竹供清吟俛仰一逆旅  
乾坤古猶今

謹和 老人蓮桂 二絕

點破秋光數葉荷水清時見小魚過渟涵風露三  
更足收拾江湖萬頃多  
搗成一百八九黃入手能令熱惱涼金粟如來身  
已化蕊珠僊子骨猶香

移居西郭重樓 閏九十八

欲歸未辦買山資東寄西存漫一枝樓上起樓渠  
自巧客中作客我何癡崎嶇溪步通虛市鬱屈山

蹊護短籬不用子猷親種竹屋頭元有綠猗猗

自和

得寮便住似西資誰暇安巢更擇枝閤密不妨中  
酒聖樓明大好養書癡誌公分料存刀尺龐老家  
風欠笊籬大厦千間宵八尺傍人莫笑太窮猗

小雪前三日鍾冠之約余侍 老人行

山舟發後洪入杜塢自鄭蓋庵過閬山  
趨翔鳳山菁山徧覽楊墳秀園遂至何  
山道場山乘興薄吳興訪玉湖書院水  
晶境界而歸自戊子至庚子陰晴相半  
勝處輒徘徊賦詩飲酒偉哉觀也數詩

見後

溪流轉處兩三家落落疎林淺淺沙可是小春風  
物早檐頭一束杜鵑花

右長橋渡

止水攪不動好山邀輒來松間寒月晚似欠兩翁  
催

右閬山妙嚴院松月堂讀張汪二公

詩有感用無垢韻

鈎輈格磔鳥呼晚勃窣嬾人試寒野水不流山  
四合寶華雲裏着欄干

一徑白雲明似雪蒲山紅葉豔於花過溪買酒等

閑事只恐客來非當家

右宿妙勝閣

無雨又無日此行天相之荒園遺木老古隧得峯  
竒霜晚蔬猶劔風温茗已旗行厨何用許勝處可  
忘飢

右出閬山

狂暖釀成雨逆風搖斷撓寂談王舍衛悶想鬱臺  
蕭遊興孤芒屨歸期數翠翹推蓬占霽色木末散  
聲招

右謹和 老人鳳口遇雨

聽雨客無寐放晴山有靈禪關深紫翠勳廟肅丹

青鼇負摩雲碣龍扶拱日屏真如無盡意石澗水  
泠泠

右翔鳳山資福寺

古木陰陰元老蒼月於踈處弄昏黃巡簷不見梅  
花面認得東風句子香  
小窻無欠亦無餘一榻翛然雪透膚收拾故書藏  
恰好怕人寫入鳳山圖

右宿資福小閣次梁間韻

生前圖形耀凌煙死後起冢高祁連塚樓陰合蒼  
官立輦路苔生石翁泣吳人最重十月朝紙錢掛  
冢風飄飄積金至斗命可買玉帶貂冠鎮長在

右楊墳

日高裹飯看何山山缺東南水遶關松檜不搖風  
自度讀書聲在白雲間

右何山書堂

何山如幽人道場如大家穰穰衲子脚刺刺騷翁  
牙挾雋控寒飈搜光躡晨霞危顛矯窳堵平疇畧  
汗邪巖泉跑虎湧徑松髯龍拏鍾梵破深寂金碧  
開紛葩脩廊步履峻傑閣望眼賒山勢珮玦蠹湖  
光鏡奩訝清茗杳靄入古弁空濛遮列翠軒名不  
可唾群籟無敢譁坐我旃檀林酌之槍旗茶宇定  
岫出雲語妙天雨華吾生久墮甌昔遊慣乘槎夷

猶廬阜陽宿留岷江涯高曾凌嶠棧卑或搜崖窪  
昨夢難歷省此行足雄誇老親八十健閑儔二三  
嘉拍浮一葉眇收攬萬景奢富貴上蔡犬貧賤東  
陵瓜未湏笑落鐸誰能苦齮沙候門占噪鵲旋橈  
趁歸鴉竒事恐沒沒舉詩屬僧伽

右道場山

茗雪趨太湖地少天宇寬高低寶樓閣盛之水晶  
盤中有讀書廬八窻頰晴瀾衡弁儼相望不受湖  
光吞彼美金玉人伊吾斗闌干騎鯨渺何許衰柳  
風露寒

右玉湖書院懷二倪

繫舡官柳根闌闌得深密日落遠水明雲收好山  
出天開有聲畫人立無價壁酒行不湏多鷺下菰  
蒲夕

右葉推官無盡景

梅 兩絕

風霜搖落都盧盡一點春回造化家萬物成終又  
成始湏將良體看梅花  
寒根不與物俱陳髀髀梢頭寂寂春却月凌風誰  
會得不沾一葉是真身

和樓前梅 兩絕

飛香漲艷拍簷牙暖熱樓居鄂陸家寶髻盤鴉冰

柱曉倚闌平折北梢花

樓高夜靜月華陳冷浸含章一段春人影花光相  
上下定知梅亦解分身

送李致遠安遠簿二首

四海幾青眼五車今白頭信天投矮屋覓地起岑  
樓山迥風煙合江平潦霧收誰歟人物計留取備  
枚鄒

與我迭知己喜君初得官時來寧論晚身健莫辭  
難訪雪牽魂夢停雲寄肺肝斯文元氣在努力好  
加餐

夜坐

夜永難為睡群兒坐伴翁漉虀冰甕碧撚豆雪爐  
紅清誦聽還雋閑談笑又烘安排明蚤供薺長後  
園叢

大人和云樓底雪千峯樓頭着寓翁梅  
方開萼綠桃已亞枝紅斟淺偏勞勸眠  
遲不受烘錦城春在眼何暇問蠶叢時  
四川李制置以榮州見辟辭之也某因  
用前韻

寄榻高寒地收心懶散翁雞鳴虛室白鴉起小窻  
紅古操塵絃拂新詩凍研烘桃梅芳意覺不是去  
年叢



洪崖圖行

葉知錄溥臨龍眠本見遺

脩髯危肩老僊人布袍革帶烏靴巾曾中不着半  
點塵天地萬象胚暉春扇者摘書者栗瓢者木韁  
而掣者葛笠而鞭者拙中間厖然大者雪從我兩  
髯三髧一蹩蹩驢何鈍奴何癡前掣後鞭趣使馳  
麾鞭愈急行愈遲掣韁欲斷人驢疲但見尻禿禿  
蹄局局欲墜不墜止鳴木本無伎倆能噴玉正可  
吞聲春草綠先生御氣存其神下驢步行意更真  
從渠蹇材拗莫馴超然目送八極轡鳳驂麒麟

歲晏

得路隻輪車易上失時獨幅被難眠淡黃蘼飯茅

柴酒東掩西遮也過年

百想卧輪翻伎倆三生圓澤弄精魂何如靜對梅  
花坐春滿江南雪後村

謹和 老人賦梅

寄得江南驛信來窺林映水幾枝開形容綺語空  
能絮酬荅芳心揔已灰厭舊趨新和粉染奪真弄  
假點酥裁紛紛兒女春風惱却笑詩翁醉打隈

和趙保之青田即事

寶犀壓帳春風入渴烏傳箭寒澌滴若然推枕起  
放衙霜月滿庭鳧鴈集簿書顛倒六作五文移縱  
橫一取十精神坐照吏姦破政事流從儒術出墨

池霹靂送飛雨積案如山笑譚畢逢迎合爪迤相  
賀戒石亭前見天日公餘琴疊舞胎僊客退爐熏  
齋繡佛芳蹊桃李不自言舊燕新鶯沸消息詩筒  
入手如見面金井新泉生玉色汗青不朽須早計  
過眼年華征羽急

臘月二十五夜

角玉懷雪狸膾銀憶冰鱗異哉山澤荒坐我窮鬼  
祟兒頭似耶白相對玩殘歲爐寒灰熒熒燿涸燈  
翳翳擘柑老赤脚煖酒小青髻一酌佳入蔗再酌  
甘勝薺陶然會道妙嗒然司德契吾身與乾坤共  
此小關挨三百六十節一節一節繫四萬八千息

一息一息繼日月有往來陰陽有開閉太和行其  
間周流無邊際臆盡梅紛披春回柳摇曳非時難  
強握有命莫過計顏回簞瓢空季路緼袍弊只恐  
非大賢公不待後世

送程宗武遊峩峩

驟暖握芳意薄遊烘軟塵亂山雲氣曉啼鳥杏花  
春人物少催老物華新換陳一聲鏗爾瑟沂水綠  
鱗鱗

謹和 老人雪晴

雲屏九折跨三休公欲行春雪不愁逗暖流澌鳴  
暗谷送晴倒景漾層樓似無似有草痕動半落半

開花氣浮婆餅焦聲林外起便從野渡喚橫舟

元寂宮生祠行

上元庚申

間臺珍館嚴鶴林老桂鉅竹籠春陰騎鶴僊翁杳  
莫尋適從何來貂插金裳珮丹青雜瓊琳旗旛繡  
綵薰甲沉蕊函三洞羅森森雲璈九奏鏘悒悒擁  
爐步虛搖箕參稽首寥陽祈博臨庭下朝謁紛冠  
簪願言福壽高於岑問子為誰對輒瘖以目代口  
手拊襟伊民豺虎國蠹蟬細大敲剝無遺針凜虞  
膏血供几砧巧諛曲媚求回心天乎少戢湯火燭  
庶幾沸魚逃釜鬻上帝福善禍必淫高目下耳一  
監歆察此頌禱皆呻吟革彼飛鴉懷好音嗚呼愛

而祠者古畏而祠者今安得皞皞相忘武城弦歌  
單父琴

婆餅焦

萬斛精神一握身清吭宛轉欲飛塵雞纔唱後便  
知曉燕未來前先得春驚覺海棠休苦睡提醒楊  
柳莫空顰最憐吉語能相報麥熟同為鼓腹人

孫教授挽詩

手織天孫錦曾吞海若洋官卑材不盡年往慮空  
長啼鳥呼春夢飛花餞夕陽唯餘君子澤插架簡  
編香

笋蕨

平齋集八  
小兒握固骨何弱稚子着綳肌尚寒豈不愛渠風味好只應催我鬢毛殘

浴罷氣體和

浴罷氣體和坐睡便胡床首歎如汲瓶數俯輒一昂曹騰復曹騰慾泯想亦忘乾坤孰高下今古誰興亡矍然瞳兩眼踈窻半斜陽窻下櫻桃花無風自吹香

金不換歌

東家鼎貴萬戶侯西家暴富十谷牛喚絲呼竹進玉舟把酒已作明朝愁中間人家賤貧慣既得未得兩無患晏眠起喫盒菜飯飯罷亂拈書冊看此

樂名為金不換

酬東風引

魏鄭公田舍翁陸敬輿老獠奴斯人斯人尚如許薄命蛾眉何足數野桃溪杏次第紅脫袴博酒酬東風

溪行

却掃晝陰永意行溪上汀鬢華年減黑草暈日添青魚舞新磨鏡鷗飛小畫屏梨花寒食近誰與管飄零

用吳祕書正月晦韻

攬春群玉寫芳懷次第安排到藥苔但得斯文留

脉在須教我輩放眉開  
踈風細雨桃花過竹屋柴  
門燕子來老去湖山無復夢  
荷鉏西崦覓橙栽

禮滅翁退天台能仁院歸梁渚一絕寄之

倒剗枯藤立晚風  
山光不與水俱東  
蘋花落盡蘆花老  
地闊天高一箇鴻

櫻櫚

舊脫敗蓑亂新添華節  
高肅容春尚靜  
俠氣夏方豪  
黃孕子魚腹青披孔雀尻  
豐撞知可製雷動景鍾號

碧桃曲

草平不斷瑤池路  
樓礙東風花滿樹  
綠眉素頰澹裙裳  
月華暖透三更露  
雙成飛瓊妬高妍  
引梢搖月分嬋娟  
雲璈一曲迸空碧  
青鸞驚起花翩翩

燭下次海棠

紅深翠淺浣花春  
投老相逢過所欣  
有許精神宜半睡  
無多醞藉莫全醺  
涵渟芳露須饒月  
籠護晴暉不礙雲  
成就化工真富貴  
天香更與牡丹分

送李微之倅成都

鳳生丹山西來為太平  
符矯立青琅玕  
祥雲蔚相扶  
一鳴合簫韶  
再鳴應騶虞  
散為清明風  
萬象皆專與色舉  
抑何決矢脫金僕  
姑憂摩參旗  
高可望

不可呼穿花迷嬌雉  
唼藻戲乳鳧搔首重太息  
春陰渺江湖

次叔厚韻

夢斷紅塵踏九衢  
雲山佳處借樓居  
採將瓠葉隨  
宜煮拾得榴皮  
信意書未問我  
今忘我世須知  
吾本愛吾廬  
黃公壚在花陰裏  
磊砢從君一破除

二佳

佳笋如佳人  
柔哲飽風致  
佳醕如佳士  
醇明負骨氣  
此笋配此醕  
可愛不可醉  
得醉豈不好  
醉恐不知味  
蔚如王謝家  
文雅將富貴

二月二十七遊僊洞次壁間韻

點脚地維絕  
舉頭天語聞  
瀑泉飛響雪  
洞石湧崩雲  
縹緲追元放  
低回揖郭文  
神清知好在  
煙鎖綠苔紋

用韻荅趙主簿

逸氣蓋三謝  
英詞參二班  
飛綏宜北闕  
枉駕忽東山  
花妥晝陰寂  
絮吹春思閑  
光風知幾轉  
盡付酒杯間

謹和 老人羅山

自鑄鐵成錯  
誰吹灰使然  
俗情床上下  
野趣蜜中邊  
花豔明光錦  
苔痕白打錢  
醉翁詩板在  
山莫放童顛

寄題辛氏塵外樓

羅浮三十里樓對玉崔嵬風卷軟紅去雲扶飛翠  
來會心須盡帙適性莫多杯除得翳根盡靈光生  
鏡臺

初夏

鶴帳華纓絕牛蹊老屐穿薄晴生晚呀深綠護餘  
妍萬卷不堪煮百懷空自煎朱櫻黃苦笋小酌便  
陶然

里人送芍藥用韻

詩墨淋漓似小王殷勤包贈暖紅香揚州金繫腰  
何在隨分留春共一觴

寄高子厚

因讀東坡馬生本  
窮士詩有感而作

盤隱門下客流落餘兩箇我故稔子窮子亦諒我  
懦穉松高未尺早望屋脊過小蓮出纔寸便譽車  
輪大急灘倒撐舡狹路錯推磨不誚材無堪祇嘆  
命未作去聲沽酒勞閒寂畏飯問寒餓為分猢猻  
愁相對橐駝坐有無共甘苦休戚先吊賀綢繆平  
生期荏苒歲月蹉人情少耐久世事難預課欲尋  
買山盟恐踏筭甕破

憫農

時邑令  
建長橋

麥黃蠶登簇秧青雨催耕農家竭作時無工搏蚊  
蟲短杠鴈鷺進脩綽螻蟻行謨蓋溪壑蒲名言輿

平齋集八  
梁成吞聲不敢怨但願天長晴

和禮滅翁感錢氏舊事

民不知兵物自華表忠消得老碑誇虎符龍節故  
王國鳳舞鸞飛今帝家遺廟斷垣低榭葉荒村舊  
井濕桐花馮夷尚怕潮頭弩一望西興渡口沙

滅翁為日者求詩

大橈甲子一串穿東州西州走諸禪芭蕉虛實果  
何物橄欖苦甜猶問天華光佛壽十二劫瞿曇像  
法一千年兩翁見子肯倒屣好為推到無生前

用鍾侍郎韻贈懶谷

蒲團竹几妙高臺瞑坐何能放眼開門外白雲多

事在又將飛雨出山來

暑夕

樓高收晚照野迥送宵陰鷺下汀沙靜螢行岸竹  
深櫻寧和順氣綠督正平心轉物天機妙昭文不  
在琴

王章

皂囊盟手自封題忘却牛衣忍凍啼一點丹心通  
碧落歲寒寧負白頭妻

暑坐

隔簾草樹隔溪山密密深深洞啓關水色山光無  
障礙南風送入亂書間



謹和 老人夏日東山即事二首

剗草根湏盡傳花葉未多明波撐窄堵老石卧盤  
陀煨美甘分芋蒸肥欠畏荷醒然下山去明月滿  
林阿  
菜把野園送花枝隣巷賒搗蟾和絳雪騎斗弄青  
霞古帖臨禽李新詩續稻瓜晚涼隨杖履携酒訪  
魚槎

田家建除體

建鼓勸竭作除田綠紛披滿築沮澤岸平流綺塏  
陂定約欲水均執熱願雨隨破柱雷電合危簷溜  
紳垂成功一天瓢收穫萬京坻開元正觀盛閉關

更休師

和趙青田燕坐

青田鶴翁杜德機天根月窟手探之嬰兒姹女熟  
搏弄妙處不許旁人知渠家庭院紛花藥啄木黃  
鸝幾推卻流蘇百子卧春風萬慾難供無底壑生  
門死户一線間内丹走盡求外丹明朝赤黃裂犬  
山護鼎龍虎方閑閑

新秋藥名 兩首

老色蒼蒼耳向聾秋聲欺得白頭翁已甘草詔元  
無分只苦耽詩久欠功引興從容風月足放懷浪  
宕水雲空雨餘涼意生庭户夜半天河鵲信通

兩眼旋花雪點鬚鑽頭故紙枉工夫勸懷懶附子  
公櫝閑性熟諳摩詰圖枝拂雲香行到桂葉隨風  
舞又催梧乘槎欲到空青問織女牽牛事有無

謹和 老人官山看高子厚修墓

秋風問訊老芙蓉靖節前行後阿舒緩策穩過金  
絡馬小烹佳勝蔗漿厨何榮何辱人千古誰是誰  
非冢一區遇着好花隨處醉莫論他屋與吾廬

用子有述懷韻爲壽

筆力強於二石弓文場早合擅元戎東西塗抹未  
爲老左右圖書那得窮三日窺牛酬壯志十年到  
鳳策竒功更須傳取長生訣蜜炬高燒不受風

俞成大送新芋

謝三郎女敗蓑衣縵縷中藏玉雪肌柱下莫愁無  
乳媪秋風得此可忘飢

范待制子長挽詩二首

太白曉燄燄飛鴻秋冥冥氣節蚤已勁勲名晚逾  
馨冰霜蜀棧寒風雨秦關腥一范不可作岷峨干  
古青

生不餌栢寺死纔跨松階浮雲忽易滅明月終難  
埋宇宙卓有立江山渺無涯掩卷獨搔首西風知  
此懷

和俞成大八月梅花

秋光深處送春來青葉扶疎數點梅料是知君新  
釀熟撓先九月菊花開

謹和 老人秋日遣懷

鬱鬱年來亦欲東窮魔揮斥欠天蓬得甜自喜皆  
花蜜與苦相忘獨蓼蟲張望紅杭新作業紫桑青  
菊舊家風隣翁強解人間事數問朱轡甚日熊

月下用鄭大參和沾維那圓覺韻

無縫冰輪萬古同御風飛到碧天中四方上下無  
遮礙一點清光處處通

東山即事

西風卷宿裊天高近重陽閣虛自沆瀣塔靜能琅

璫幽花多素英穠香奪春芳老木未黃落繁陰生  
夏涼棋雋決楚漢杯壯迷彭殤醉帽信孟嘉歸鞭  
忘葛強萬事貴適意誰能扣蒼蒼

九月四日過增口道中

秋光拍塞小村墟高下人家意自如屋底四蠶抽  
蛹細墻頭三桂着花踈握兒早秫酒無限杓子晚  
菘藿有餘大似元豐年界好天應容我老樵漁

謹和 老人九日

樓頭獨立夕陽西搖落高風萬木嘶人自官芻銜  
馬口我方社酒薦豚蹄一塵不着青銅鏡萬法皆  
空黑漆篋節後龍山應更好秋光拍滿錦障泥

謹和 老人賦牛尾狸二首

踏白霜明夜牽黃木葉秋爛斑文未豹韜棘肉先  
牛壓玉開三面蒸酥讓一頭酒邊纖手削醉倒老  
浮丘

北雪佛狸種西風金狗秋謀生貪過鼠逃死喘如  
牛糟熟涎奴舌螿芳點客頭何時明獵火吞盡楚  
青丘

趙忠簡孫璧見過有詩用韻

薄命窘震凌餘生颯糞朽閑閑飽欵竹寂寂老鍛  
柳溪空漁爭隈野熟飲被肘有隣晨致薤無客夜  
剪韭忽來闖戶屢自挈問字酒初見了眉睫徐語

應心口顧子果誰與恐子不我友維昔燕夾攻坐  
使汴失守應奉固亂階新法實禍首療危非庸醫  
救敗須國手豐魏兩翁奮關洛孤憤久人謀密相  
濟天意斷非偶攻守豈必同勝負亦常有誰推姦  
人出竟墮黠虜誘包將復讎戈付與掃愁帚風雲  
激矢脫日月峻輪走殘羶汚北雪遺憾掛南斗功  
名本同舟學術迺各牖一時策得失千古史妍醜  
忠簡社稷臣尚起九京否

謹和 老人初冬即事

莫怒狙公賦茅悭萬緣一定不容干老便窻下迷  
離暖醉愛尊前郭索寒肩玉晨光明沆瀣流珠夜

氣鬱蘭玕但能飽喫長年飯射虎南山有分看

謹和 老人初冬寓筆十絕

平泉草木須臾夢金谷鶯花一撮塵富貴若生根  
到底兩家占斷別無人

是非不驗道應壞禍福無憑天也荒便使曹瞞生  
賣履已賒王衍死排墻

何人地下管天條不是臯陶即是蕭金埒謾誇錢  
過斗鐵圍寧問玉垂腰

當場弄出百般奇傀儡棚中老偃師滿眼機關無  
着處到頭線索有收時

兩儀亦有盈虧數萬物難逃出入機一把牙籌空

自苦蓋棺着得幾通衣

避風臺上深情寵偃月堂中盡意謀爭柰天公無  
面目滿林黃葉一番秋

煮茗燒香雙赤脚檢書洗研一蒼頭斯文興喪由  
天在未用安排地起樓

元子掃空桓氏業窟郎蕩盡李家風前人留得兒  
孫立何患鸞枝不長桐

方窮蔡澤問唐舉未遇鄴侯逢懶殘觸石起雲能  
沛雨不應長作早雷看

命有窮通分虎鼠事無得失盡雞蟲東籬獨有黃  
花在挹取寒香壽阿翁

又和

青女籠晴試小春門前沙路淨無塵平洲水竹因  
依好白鷺飛來不避人  
往來魚虎澗流淺出沒鼠狼庭草荒宅近市傍人  
不到獨迎西日上東墻  
柳亞溪橋幾換條鬢根添得雪飄蕭清臞自信堪  
騎鶴最喜無錢絆住腰  
爾雅蟲魚已熟知更將埤雅訪農師投糟赤蟹真  
無價薦餅黃雞正及時  
終朝聒得耳神飛東舍西隣盡販機百樣攀花無  
我分慣將簾作後堂衣

架上亂書兒自整床頭濁酒婦能謀只將翹足垂  
蓮勢靜對書窻課弈秋

風裏行雲不自由低眉重整玉搔頭桃根縱有飛  
花渡燕子寧無接翅樓

寒燈芳燼發春紅讀到幽詩繼匪風吾道有消還  
有長欲將此意寫絲桐

蟹正肥時秋色老鴉爭噪處夕陽殘未湏多進玻  
璃盃蒲樹霜紅正好看

天時人事共流通何用將冰語夏蟲判爲梅花多  
釀酒春風裏着蜜翁翁

仲冬九日還可庵謁墓遂入都

未放梅梢一箇春  
枇杷花已玉嶙峋  
霜靴帶取苔痕去  
應被孤猿野鶴嗔

臺中聽雪

浙瀝松廳夜空山  
一樣聲冰霜元自勁  
水月更添清衾薄  
難留夢窻虛易得  
明庭烏催奏墨未曉已先鳴

太一宮齋祭呈司封吳舍人

立春前一日

寶鑰轟霄啓玉晨  
風恬雪霽淨無塵  
東皇太一紫壇曉  
大千青陸春  
藜杖流光環珮集  
鏐旗斂影豆籩陳  
樂歌須仗甘泉筆  
斧藻天家泰道新

謹和 老人除日

吾道何通塞  
人情自寂喧  
無羔還可茗  
有鶴不須錢  
議論追嘉祐  
聲名續正元  
壽親惟此爾  
一笑栢椒邊

清涼院僧房致齋

花片墻陰晚禽聲  
屋角晴東風猶峭  
在煨芋坐深明

銓闈董試上巳二絕

天氣年年只麼新  
官忙不似舊閑身  
油車畫舫西湖鬧  
可惜埋頭典却春

柳暗鴉嬌日正長  
筆頭風雨響脩廊  
一簾芳碧雙蝴蝶也解尋人姓字香

除夜哭內

密雪踈風客屋穿幾回除夕伴憂煎團樂方索日  
邊飯契闊已成松底眠晝火何堪思舊事理衣誰  
與管新年平時戒汝無多酌爭得屠蘇到汝前

省闈試士

東風蓆帽快行催渾爲天家造士來捧詔九霄雲  
氣濕分題五色日華開揀金沙裏須精鑒脫穎囊  
中盡異材容受直言天子聖好聽臚唱響春雷

六月五日集英殿策士從官待宣于內

軍器庫廊

漢廷與目策英豪投釣知誰首掣鰲百日紅連綸

閣迥萬年枝拂禁城高內廊坐永風生席輦路歸  
遲月映袍西抹東塗渾忘却一絢短雪不堪搔

書季允度侍郎周卿趙侍郎  
履常趙侍郎適道同待宣

六月十六日宣鎖

禁門深鑰寂無譁濃墨淋漓兩相麻唱徹五更天  
未曉一池月浸紫薇花

恭和 御製賜吳叔告已下聞喜宴詩

致主唐虞澤兆民賢才端是國精神作人欲返皇  
風古拔士先隨聖化新收斂文章歸獻替安排事  
業到彌綸宸章屬望丁寧甚上荅天恩莫愛身

謹和 老人瘳字韻



本期洗眼看伊周到此華胥只夢遊爛熳蒼苔心事晚婆娑紅槿鬢華秋藏頭欲効鑽沙鼈捫舌空成噍草牛飯豆芋魁渾好在得歸不藥病還瘳

謹和 大人喜晴

雨脚如麻日日然垂成生恐壞豐年九重貯蠶通方寸一點光明徧大千喜動朝行花底散愁銷野次葦間綠奄觀銍艾霜風晚重壓牛車倍費鞭

閏月廿六日奉 御香祈天竺觀音於

昭慶寺是日得霽

大士慈悲出補陀掃除陰翳作人和武康芋子鹽官棗遇着豐年也倍多

謹和 老人賦退朝

世事鵬斥鷃人情燕伯勞心須腔放闊眼要孔提高陳力惟求健承恩敢恃牢熟思歸計是春酒薦萋蒿

下元節後省試進奏院吏

推雲不動雨聲苦醞雪未成風力乾瘖驚一庭淘墨汁也煩老子坐深寒

十一月五日鎖學士院

樓頭禁鼓試初撾催草江淮督使麻落紙一簾風雨疾不知斜墨陣翻鴉

直玉堂和李參政絕句

平齋集卷八  
九四  
曲折宮墻日影方堂深人靜似山梁椽櫚葉底梅  
花老次第風光到海棠

老人生朝為壽

迎侍京華又見春天時人事一番新丙申兒遇丙  
申歲已卯爺逢己卯辰本分法門行得熟長生樣  
子學來真斑衣奉酒多為壽滿眼光風正可人

正月十九日孟享從駕

黃繖中間一點紅繡雲鹵簿海棠風鈞容聲出雲  
霄外馬上誰憐有老聾

新將給事換前銜班被真除法從攬道是緊頭人  
不信回看壓得兩緋衫

游景仁吳叔永兼權侍郎

太廟致齋

風雨殘春晚作晴寶山深靜勃鳩鳴雲收翠戟龍  
文潤日透金鋪獸面明蠶出火時桑正沃秧抽穎  
處麥還成在天 列聖孫謀遠流福人間釀太平

平齋文集卷第八

平齋文集卷第九

記

饒州州學新田記

弁峯葉公司臬江左之明年某來庀楚泮一夕漏  
過午夜屣脩廊齋廬燈半明滅聞有扣庭竹而歌  
日月連娟兮露垂木蘭厭浥兮蟬飲之采頤兮疇  
屬饜不如東湖洋洋兮可樂飢又歌曰露函月兮  
相輝鶴鳴九臯兮止復飛屋漏兮尚不愧羗三月  
不肉兮吾亦肥其思深而不迫其音悄而不怨甚  
異之明發謁臺下爲公誦所聞公笑謂予得無與  
廣文飯俱不足耶因問歲入之目予謝不與知獨

數慶曆元祐以來幾豐碑以對而終以罪歲公又太息屈亡幾以番水下鄉在官之田歸于學最五頃有奇山稱是儻廬數十楹已而攝郡組且還續食之布意尤未艾也夫教與刑同出而異用出教則入刑皆以約人心歸諸善公亭刑一道聽訟以平鎮俗以靜格姦暴以誠惻然念民力之窮而甘苦同之民隱然恃爲太山而心不搖簿書期會時方蠡午獨汲汲學官之是崇壽名教之命脉扶風俗之元氣其深識輕重緩急之權度者歟饒學居臺府鼎峙之地刺史二千石士皆能皂白之每爲予言三山李公珏握憲節時威名凜乎動人康山

膏腴十頃舉以加惠于學視疇昔始廢告朔之禮而斂吾所有以肥杞者賢否何如也今李公平反西道與公實共長江聲明風采彪丙交映詩曰矯矯虎臣在泮獻馘江右以是期李公淑問如臯陶在泮獻囚江左以是頌葉公公名簣字景山嘗任太府少卿今直寶謨閣嘉定三年四月朔旦洪某記

### 重築采芹堤記

城東數百武爲泮宮貢士之闡冷官之廬附庸而翼之督軍湖匯其右貫湖爲堤徑于學湖裂爲東西西湖在堤北倚山渚水植以蓮菱隄無風濤撼

斗齋集九  
觸故不壞東湖在其南瞰湖有亭曰采芹夷曠虛  
明莎蕪彌望潦水時至挾風塵岸拍拍作聲不少  
息日朧月圯闊不能半尋歲大比縣編竹貯土補  
葺以苟目前事已輒頽折如是婁矣余來分教每  
出擇地而履或夜會風雨寸跬不前毛髮磔立因  
念士與民同出是塗可拱睨不問命縈石爲趾每  
五尺捷以石笋東爲層六西益一開級道以便下  
上者三覆石甃以草擊根盤結不可動鱗次而上  
以殺水勢廣十有七尺崇十有五尺脩一千二百  
尺植楊護其趾且爲舉子繫纜地烏相合抱垂蔭  
下接景益深秀作門于西扁以泮水役始於去年

十月甲子訖二月壬戌凡靡錢二百萬嗟夫物之  
成壞也有時時之難易也有數堤昉於文正范公  
再築於元祐之庚午余之增築又適當庚午之冬  
周兩甲子所成僅爾謂之非數可乎更兩甲子陵  
耶谷耶嘉定四年春社前五日錢塘洪某記

### 東圃記

余旣結樓廡西偏以受兩湖之勝東偏有隙地數  
百步畦蔬灌莽爭長遂規以爲圃買梅數十本手  
自扶植少長有序寒香冷蕊綠陰青子人所共愛  
秋後木葉脫盡若枯不枯欲蓄未蓄更自佳耳梅  
有君子之德臭味同者必愛之或不好事析之不

中薪斲之不中桷亦足自壽旁種竹數十箇忍者  
戕饒者懼其不能與梅俱久梅下薔薇整整就  
列可編以爲屏萱菊成窩隱映陸續水仙芍藥必  
火于秋分培其根使豐碩乃能多華金沙酴醾上  
蔭惡木援昌條而升之萎蕤下飾庶幾惡者亦轉  
而良因窪䟽沼輦淖毓蓮隨種即葩葯殊快人意  
久不雨則躬抱甕之勞壇有新安牡丹方苞須籠  
護以防鵲啖有庶蘂則搔去母使分正氣巖桂初  
移更數年乃盛小松高不能尋丈又當期之百餘  
年後桃杏之繁葵榴之豔海棠之姝麗風日佳時  
若有矜色特未知松桂肯之否築亭其中表以百

花頭上獨主梅而言者春秋書盟會之例也客笑  
余名亭有舉子習氣余夜夢游場屋觀榜帖則躍  
然以喜習氣未除安敢諱異時士友藏脩之暇婆  
娑梅陰采華撫實必有能爲我誦角弓之詩者嘉  
定壬申仲春望日記

### 揚州重修城壕記

廣陵負淮挾海前頰大江槃槃爲一都會古蕪城  
昉吳王濞而拓於隋俯仰千古岸移谷遷坡陀瀾  
池隱起蒼莽間後周顯德中韓令坤相攸東南陬  
別城以亢治所周二十里一百五十步崇二十六  
尺是爲今州城 國朝盛時南轅北輶走集旁午

如奠枕堂皇無所事乎金湯之險六飛南駐郡爲  
北門重鎮形勢控帶繕防日嚴培庳葺陋萬雉鬱  
起矗如長雲望不可極而壕河堙陜日甚稍不雨  
則褰裳可涉嘉定甲戌春金部郎崔公出鎮是邦  
厥初視事登陴臨眺進父老而問故謂役費夥繁  
民壤綺錯且城東高卬平行虜嘗頓兵浚下增高  
守禦非宜坐是噤不敢輕議公慨然念天下事患  
不爲耳度遠近準高下程廣狹量淺深圖成而鎮  
江都統馮榭實來聯請于朝尋報可屬時晏清弓  
韞矢箠戍兵湏暇售力相先植表作旗萬甬競奮  
行行伍伍一無敢譁單車巡勞犒給有度蒐簡勤

惰勸懲有章日出而作未昃戒休嘯篁坎鼓歸營  
驩動其施功自東徂西而終於南因地相宜河面  
闊至十有六丈底殺其半深五分廣之一環繚三  
千五百四十一丈壕外餘三丈護以旱溝又外三  
丈封積土以限淋漓又展地七丈以受土使與危  
堞不相陵民地抵歲入庾其直事已俾復作業城  
五門爲月河總百十七丈而南爲裏河又八十七  
丈呀然而淵沛然而川波光柳陰下上交映實墉  
實壑深與高稱賈航罽艘並帆疾馳萬目驚盱前  
所未睹西北曰堡寨城周九里十六步相去餘二  
里屬以夾城勢如蜂腰地所必守左右尤淺隘濬

平者集九  
之槩如州城壕以丈計者七百三十有一且甃女  
墻以壯其勢郡倚三塘爲固有邊遽則疏陳公句  
城塘水灌州城壕支河引水入九曲池合雷塘水  
灌西城壕公先是封築閘柵斥大隄岸渚水益湊  
漾兩壕告功試決而注之水僅落數寸而河流四  
溢矣經始于八年八月訖于九年九月工一百一  
十五萬四百二十五費 朝家緡錢三十四萬八  
千七百五十六米石二萬一千八百四十七州家  
激犒爲緡錢五萬一千六百市河貫城即古邗溝  
南距北五里六十步外壕旣深水勢趨下市河涸  
不可舟就加深廣三分廣一新輿梁五又費緡錢

四萬有奇公以正大學問發爲政事所至聲迹章  
灼擊楫東來恩信孚浹軍民歸命恃爲長城識者  
以經濟事業望之斯役特細耳客謂孱虜垂亡機  
會方集何規規守是爲公曰不然古人設險如弈  
棋置子雖踈取勢欲廣楊爲根本要地控海沂而  
引汴泗取勢爲獨多吾試與子馮高而望中原故  
壤一目千里強本折衝顧不在茲乎客領之去是  
役也參議陳師文機宜何處禮提督通判高惟月  
鈐轄劉謀節度推官鮑克正受給統制孟顯仁總  
轄統制王明元真統領韓亮王孝忠張健李進李  
琮莊安國夏榮部役敢勇精銳武鋒神勇左軍強



勇鎮淮則其役兵也公名與之字正子南海人

利州通判廳記

上更化十有三年南海崔公以名瀆從出殿成都東其屬得宣城孫君若蒙正叔爲成都宰與俱西明年公盡護全蜀闢幕府于劍外緝忠哀益正叔參焉又明年辟通判利州利以寧武冠其軍介梁益拓表撐裏自昔號重鎮中興後臺閩鼎立又重郡太守印綰以部刺史丞貳非它郡比也舊有廨郡治東歲庚辰合爲大行臺郡治麗于漕郡丞偃偃無與歸濡需而游宴藪而泊吾腹果矣它不暇問正叔以爲大愧一日過南門綿谷故驛掖仆碑

摩杪讀之皇祐中規置也秦蜀同軌利當孔道故崇大其館以羸客使其後郡將兵鈐迭嘗亶薄近復釐爲四五以廬僑士叢猥族紛左侈右壓庭下老木數章突兀輪困猶有百年文獻在正叔喜曰可矣退而咨諸長長曰可哉翼衡以從張故以新迪晦以明堂序有嚴官府具體旣表舊扁諸大夫相與落之三邊無塵野無遺秉可信眉一醕矣書來屬余以記余謂天壤間孰非傳舍閱人之地况毀室於鴉取巢於鵲抑有甚不獲已者未足爲正叔書也憶疇昔過正叔抵掌劇談世故節節中窾卻其言利者怨之殖也名者忌之的也忿與怨損

之棘也氣壹動志者壯之蹶而得者老之蝕也天下所謂磨之不磷灼之不焦震之不碎者惟一誠實而已身不行道不行於妻子苟誠其身則可以順乎親信乎朋友而獲乎上真者不可矯昭者不可匿也余聞而惕然向知正叔之老於才今知正叔之老於學故書嘉定十六年六月朔洪某記

清約堂記

參天地而立者人包天地而運者心同是心也而有人心道心之別道心性之存也人心情之動也情動而百欲生故危之危而難安未至於亡也故猶可及反反則危者平矣顏之復曾之省反身之

謂也然省在復先能省而後能復顏子有不善未嘗不知知之未嘗復行隨省而復也曾子則用力於省者顏色之正容貌之動辭氣之出戰兢惕厲警察精密無一息之間斷而夫子之道竟以是得三省之積一貫之入歟晉人張君承祖伯脩學博而材偉氣明而膽壯舉天下禍福利害莫能壓之試劇成都期年政成作堂以休扁以清約殆老於世故落其華而取實將以是志所省乎夫養心莫善於寡欲其爲人也寡欲雖有不存焉者寡矣其爲人也多欲雖有存焉者寡矣此心具清明之全體人欲一萌清明隨蝕去其所以蝕清明者而清

明還則本然之心得矣故天下之損莫大於欲人心之所當損亦莫急於欲邑大夫公餘退食燕坐深省曰夜氣之存其不爲旦晝汨乎雞鳴而起其於利與善之間已辨乎宮室之美妻妾之奉所識窮乏之得我其不爲之動乎口之於味耳之於聲目之於色四體之於安逸其知有命而委順乎內以敬而直外以義而方敬義充塞於內外物慾無自而入則民被學道之澤矣董幼宰不足進也詩云蒹葭蒼蒼白露爲霜所謂伊人在水一方西鄉舉酒爲伯脩賦之寶慶初元八月旦日古潛洪某記

### 洞霄宮施田記

洞霄距行闕三舍而近翠華臨幸舊德典領廷綏寺紹崇禱旁午望出璇臺珍館之右星冠羽衣來游來處常不翅數百千指九霞八景晴霏濕翠朝攬夕挹充然有得而主其徒者每皇皇懼無缺數衆之弗克澹唐中葉嘗賜觀庄田一所國初錢氏籍以歸有司祥符中賜仁和田十有五頃除其租政和中易賜膏田千畝逮紹興初通明殿于宮之東偏又歲有常餼以給齋祭列聖涵育之恩至矣賜田中更多故僅存磽瘠歲入不足支數月都監官事龔大明語其徒王思明王大年前是住

山潘君三華尚能斥橐裝買曹橋田以繼粟吾徒  
可坐睨寬鄉上腴大家腐陳丐彼有餘輔吾不足  
庶幾我疇我耕我庾我積以裕我後之人怡聲勸  
相堅力經度其志卒以酬畏壘旣攘姑射且熟鼓  
腹升平稽首萬壽欲與是山相爲無窮來諗予爲  
記夫道行乎天地之間日用飲食何者非道先王  
以是生養天下一夫授田百畝于耜築場有其時  
糾笠趙罇有其具堅好穎粟春揄釋烝有其成墻  
屋有桑疆畎有果菰柵有雞豚沼有魚鱉身勤於  
所養心安於所止一毫無待於人此王道所以爲  
盛也世降道裂始有食非其力者浮屠氏幻而辯

能撼人以禍福媵陌綺錯鉢巾雲趨所至皆是而  
爲老氏之學者大氏以清淨無爲爲宗湏於人者  
狹故其廬聚不能十佛之一雖名山藏室大洞殊  
庭號稱海內之望亦往往微常產以自殖其教然  
也於其教清淨無爲之中而能謀長以殖其衆可  
不謂難乎雖然樂與餌過客止道澹乎其無味視  
之不可見聽之不可聞而用之不可旣爾師之說  
然也繼今不以口體爲心害宜有進乎澹而無味  
者余家天目之陽去天柱爲近間當分半席叩之  
施者生有祈死有薦其姓氏畝石附見碑陰云

於潛丞廳續題名記

吳門葉君芑丞吾潛諸臺交薦其材垂滿過余以題名更端屬之記且曰官無庠崇職無簡繁事無易難惟敬則行居是官而罔其思非敬也居是官而出其思亦非敬也上不侵官以僭下不怠官以曠心止於事靡他其適如農有畔行無越思其斯爲執事敬乎芑不佞何足以及此惟是常平義倉之賦受丁口力役之簡稽暨上官所以奔走使令之悉惟謹土膏脉奮凍解泉動出入阡陌程督坊瀦日與臺笠襪襖相爾汝過此不問也有堂述六面山而俯沼嘉卉美竹參伍布列暇時玩游鱗之溶曳聽幽吭之啁晰弄柔芳而坐密蔭以休其心

負丞不負丞不敢知也余愛其言知敬於職業因筆而畀之石且告來者

奚疑堂記

爲楊尚書汝明作

太極運而陰陽生陰陽分而剛柔斷人具陰陽剛柔之體而性太極者也氣稟則有不齊得陽剛之粹者爲正直爲平易爲靜定爲勇決得陰柔之偏者爲便曲爲險躁爲多愛爲不果自昔聖賢所以擇精而守一與道俱出與義俱入進不恭驕退不吝屈動以天而不牽於物剛實爲之夫剛者疑之斧慾者疑之蘖慾則不能剛矣剛而無慾然後能知天知天之所以命我者不容毫忽人力於其間

則能安乎天凡利害禍福榮辱得喪錯立乎吾前  
不將不迎不掣不撓躍如脫矢若如奏刀沛如決  
千仞之隄而赴平川疑何有哉今寶章閣學士瀘  
南帥尚書公表和而裏也剛其立朝不沽激以爲  
異亦不媵阿以爲同惟時之中締知茂陵廩廩材  
用一日幡然請蜀麾而去築堂家山顯爽靚深志  
將老焉間斯燕斯謂歸去來一詞指在末章先君  
嘗欲以奚疑扁所居未暇也遂名之易之遯曰肥  
遯無不利無所疑也見於上九之剛坤之六二不  
疑其所行則動而剛也有是剛信道而踐實任運  
而養胖處貧賤無患得之心處富貴無患失之心

遯與坤所以均於群疑之泮然見幾以用遯違世  
者之事故其剛著於外敬直義方而德不孤用世  
者之事故其剛動於中靖節違世者也公用世者  
也違世固安乎天用世抑何往非天哉昔伯起傳  
秉及彪四世德業蟬聯相輝爲東京名族清白之  
遺也公以安乎天者上承考下以詔子若孫德業  
庸可既乎敢爲楊氏賀且爲楊氏勸

著圖書所記

余誦天隨子杞菊賦愛之因取著圖書所名閑居  
之室菊坡爲灑其扁廉頑立懦之風可挹也嘗言  
曰結繩以前未有書有書自易三畫始易在天地

之先而畫顯於一陰一陽之後陽奇爲乾陰耦爲坤陰陽奇耦之畫交而文生焉故易者文之太極也詩書禮樂春秋論語文之兩儀也諸子之有見於道有補於世教者文之四時五行三辰也太史之紀錄先儒之訓詁文人才士之撰著騷人墨客之賦詠公卿大夫之論奏百家異端稗官小說各求自表於世其融爲江河峙爲山嶽散爲風雲雨露磔裂爲草木之華昆蟲之鳴不知其幾也而總之爲圖書其出於河洛者蓋其元也前代書皆褚素傳抄至五季始有六經墨版 國初又刊司馬遷班固范曄諸史以幸學者猶未盡然也今則靡

書不版矣手抄之得難版傳之聚易得之難則讀之力聚之易則有書不讀如前輩之慮蓋多然亦有由也士未一命晨窻向白執編而長哦夜膏欲涸掩卷而紬繹莫非所謂科舉之文書非不讀也而讀非其書及旣一命矣日以司空城旦從事神疲力瘁於簿書文墨中書不暇讀矣爲士而讀非其書爲吏而書不暇讀勇於學問者顧不爾而力與心違類不能不爾故惟不士不吏而後可以力於書余家合新故書亡慮萬餘帙放斥還山無場屋之冗無官府之勞書於此而不讀真不讀矣卻萬紛以保靜措雙矐而就明日課一編心領大義

老退雖不能彊記如苗得旣生意亦新易曰君子多識前言往行以蓄其德厚其入而不輕其出是之謂蓄蓄之極而至於何天之衢亨則上達矣未蓋棺之日月尚勉之

於潛登科續題名記

上科詔再頒之歲冬十月己未邑令池陽程君燾修鹿鳴故事于宣化堂諸生作而言曰潛士登科有題名自慶元 龍飛始閱三十年石且溢矣表先達以厲後進盍續諸令曰唯唯鳳凰鳴矣于彼高岡地之得也梧桐生矣于彼朝陽時之得也時與地莫難乎兼得士生王國得其地矣雲風感召

得其時矣其地得其時又得觀光利賓策名奉常以階顯庸顧不謂榮乎抑涵負穹博擇精守固出可以爲邦家之光萬民之望然後榮名氏之書志榮也鄉校群居藏脩餘隙相與摩挲題刻歷訂平生非其研席之游從則家庭之詔語疇賢疇不若類荃茅而品椒檝其榮也可不懼乎知所以懼則榮至矣此賢大夫期屬方來之意也邑人洪某記

浮溪橋記

浮溪吳蜀往來之津始以略約渡繼維以舟前令邵紫微梁而亭之山潤川明彷彿垂虹宣霽分派南注潦水時匯雷轟電射橋莫克支久趙帥卿來



平齋集卷九  
十四  
索以石且屋其上規制堅密而勢益雄前年秋洪發諸山平疇廣隰潏爲一壑縱放橫軼洶如濤江直北之橋盡決順濟亦壞方令垂滿綿蕞艤度暴漲斷縵涉者仍病焉池陽程君燾至之逾年間與客行溪上愛風物之勝思策隊立壞如帥卿而重於煩民遂一用紫微成摹醜水爲十三道巨植駢峙脩闌旁翼袤三百尺廣三尋有二尺東西石梁各一星兩亭壓岸猶舊先是紫微中橋着亭麗于北坐挹兩天目以便遊息迎湍受激亭什而橋隨之改着于南勢相屬而不相麗異時亭或不力橋庶幾保無恙市材僦工直與時平手畫目授匠與

心謀不累朔而告功疊嶂危瞰漪漣涵碧霏開煙合人冉冉行圖畫中潦無停輪冰無留屨相與夸誦前邵後程不容口而君意猶若欲然者謂凡物廢興必革相循無窮壞必有由成必有漸橋凡幾變矣今揆時度力所僅就爾他山可斷安知來者之不復石乎士大夫之患莫大於吝與驕吝者拔一毛利其民不肯爲驕者毫髮及其民則施施有德色蓋無學問義理以養其心而氣爲之羸縮也君廉平有精力得故事愛人之意視可以興利除害者不慮費而橋役其大橋成不矜爲已惠而以圖堅惠遠卷卷後之人加於人一等矣紹定己丑

十月日里人記

知心堂記

昔在 孝宗皇帝以盛德大業紹開中興仁不異遠視坤維戚休如在陛栢間廼淳熙丙申秋七月制詔晉原李公夔以倉部員外郎總蜀賦望選也未上首奏利路和糴爲民害假臣三數月可永除五十年病根爲國爲民之慮目無全牛矣尋奏易之哀多益寡書之懋遷有無皆深寓理財至計臣願於經費中揆盈虛斂散之宜酌緩急先後之序通融排幹劑量取予盡變抑配舊法官自與農爲市不虧豪忽之價不取圭撮之贏而軍不乏興民

不加賦其條凡數十其大節目十有一反覆熟究皆經久實利惟少寬轡策俾得盡其愚上大奇之詔制置范公成大同詳度又詔度支郎周嗣武就覈利害悉奏所請可施行公以聖主難逢時幾易失亦連上奏願任責辦集其議三閱歲而堅定案全蜀餉道歲大約以石計者一百五十餘萬中六十餘萬科之邊氓量家業以定均敷之數名和糴實強取民不堪命怨咨轉聞 皇明洞燭萬里一意任公以寬西顧奏始上非惟九重難之公卿大夫皆難之蜀人之切於解倒垂者亦莫不難之而公見定守篤慷慨論列不少折累書與同列辨難

尤力沆如始議官糴民槩價與時爲低昂遠邇謹  
趨輦負緇屬聲氣不動而軍餉給九州數十萬尸  
踴躍呼舞始知有生之樂家祠人祝之迨范公入  
參機密上問蜀罷糴可久行否范公奏以身保之  
上悅曰是大不易得繇倉部郎再進太府卿且嚮  
用遽以不起聞當宁悼惜特予遺表恩庶官所未  
有也前是倉部綸言有心乎愛民朕實知之之語  
越五十年其子昌州守瑀掇知心名所居堂侈聖  
賢際遇之盛示世世萬子孫以無忘先烈書曰亦  
越文王武王克知三有宅心灼見三有俊心以敬  
事上帝立民長伯又曰文王惟克宅厥心乃克立

茲常事司牧人以克俊有德夫知人以知其心爲  
難人主之心存乎民而後能知人臣愛民之心知  
人安民所以爲一事也方公領餉事上未嘗識其  
面朝虛相位中莫有主之者蜀世將怙勢吝權兵  
竈虛實不容問而制閫初亦未即乎是議章前後  
上者十有三壘書下尚書報可者八變而通之以  
盡利至于今嘉賴公獨特上之明上獨知公之誠  
也此誠感動豈一日之積哉自爲小官所至以惠  
利著西憲邊防十事之奏權牧馬政七害之奏興  
元歲早免糴關隘守兵之奏康濟一念動切諸身  
指陳利病明白洞達上久已心屬至此簡知益深

雖媚將詭辭沮撓而宸翰勞問至再洞然不疑君臣之際毫髮無遺憾矣趙充國奏屯田便宜每上輒下公卿議臣初是其計者什三中什五最後什八宣帝既報將軍計是猶兩從破羗彊弩之畫未爲深知其心也上之知公曠千古而一遇者歟然公之遇合天也非人也初建議罷糴關內梁洋諸郡旱而雨關外階成西和鳳皆大有年糴價大減天知公之心矣此心上通於天而天知之君其有不知者乎人臣患乎此心之不盡不患君門之遠天之高也某日宦于蜀賢士大夫多爲誦資政黃公裳漢中行及罷糴行謂雪山可磨汶江可竭阜

陵之德公之功不可諉且感今懷往未有已也昌州以廉寬守家法進進爲時用嘗寮有雅好輒爲粹所聞以詔烝彝鼎吁王之蓋臣無念爾祖世光顯宜矣夙興夜寐毋忝爾所生尚益懋之哉

於潛縣廳題名記

六飛都吳邑加重令加選題名昉於隆興甲申續於嘉泰癸亥前後著見者四十有二人石近燬紹定戊子續記自見大夫始舊聞放失矣九華程君燾至精敏而峻絜大不弛綱細不漏目民隱吏慝蒐獵幾無遺治行亶亶逼前獻垂蒲討諸故府合題名三爲一以存往而詔來且追書唐及國朝

全盛時賢令十一人于首高山景行不以耳目所接爲僅足也然著記未免於闕文遺風或得於慨想東晉虞府君嘗爲吾長吏甚有遺愛志逸其名託錢武肅乾山濟安廟碑以傳邑自漢隸丹陽以來爲令者知幾人傳者能幾否固幸其不傳臧而不幸不傳者可勝道耶夫士君子立於世豈以傳而爲善不傳而遂已也未有爲善而必其傳也亦未有善積而名不傳也其亦爲所可傳勿爲所不可傳而自幸於無傳也雖自幸於無傳而根窳相形其溢於邦之耆老俊秀牙頰間者未嘗不並傳也書曰康乃心顧乃德遠乃猷裕乃以民寧司民

社者尚監茲哉

臨安真相院修造記

佛以大圓覺爲伽藍非劫火所能壞也而麗於有爲之迹者則有壞有興東天目之蘿山翼若翥鳳其下爲白佛院治平中賜今額開禧丙寅膺殿廬堂廡院額僧牒俱火唯門閉存主僧清皎與其徒智月收合餘燼集諸弟子詔之曰魔事至矣吾徒能以佛事處魔事何不濟汝文禮禪學而儒行名在諸公其往復吾額汝宗會銳於世故其往復吾宇汝蘊湘其相會出世間法不離世間法一念精進勝妙現前因相與信受而退明年冬禮部給額

據嘉定庚午春僧堂及廊廡成己卯春二月己未  
佛殿成紹定戊子冬佛像成門閣鍾簾尋一新近  
者倡其役遠者勸其功亡慮爲錢三十萬會行乞  
于兩淮者七湘亦再披攘經營奮空起有堅忍彊  
濟越二紀廼迄于成而智淵募建善法堂亦就緒  
佛氏願力歷三生如一日閱累世如一人名山勝  
壤塔廟之崇閣樓觀之傑麗切雲漢亘崖谷人力  
窮矣猶以爲未足大抵非一手足之爲也皎之徒  
五世相承人人以飭壞植仆爲己責志念之烈不  
爲飢渴寒暑變穹如奧如繚如闢如燁如卒不愆  
于素世之貴家大室或不一再傳而臺傾池荒弗

支弗治沈沈渠渠境變主移何肯堂之難耶會謁  
余誌興造顛末因著所感如此若夫三十二相孰  
相爲真孰相非真以是因緣而爲說法有汝師滅  
翁廣長舌相在余不能也癸巳春正月甲子於潛  
洪某記

### 竹洲記

盤洲野處之族子天成士龍蚤力學從予游頃因  
肄業之舊治竹洲以寄其志洲與崧君山拱揖一  
水縈紆琅玕萬箇著亭其中曰令寒曰吟風弄月  
怪石森植効竒表其尤曰雲根曰倚天曰華山孫  
洲之外曰樵谿曰碧澗循澗而北行百許步直王

子峯之麓有泉甘冽曰石盆衡從可七八尋泉旁  
小山橫陳斷崖絕壁勢敵千仞飛玉泉漱其左松  
風巖敞其右高槐老桂參錯蔽虧風雨晦明姿度  
百出每藏脩之暇坐清陰以數息頰寒泉而照影  
春綠晴哢機觸神會無一不可人意而洲獨以竹  
著右竹也竹之得於天者與君子同其直壓之巔  
巔而不折也其剛暴之栗烈而不移也其虛飽之  
風露而不盈也苞之寸茁而有干雲之勢則其氣  
之不可遏叢之衆卉而無徇世之容則其德之不  
可狎也而於水石爲最宜因依映帶魚魚翼翼如  
家人拂髦擲綖端鞞佩紛林立於巖君之側如冠

者童子試春服於舞雩如子大夫射策于廷如百  
辟鳴玉而朝御史執法之在旁屏氣若不息如三  
軍衿甲而陳大將軍旗鼓中立坐作進退唯其令  
也故有志於久大者取焉淇奧之竹以猗猗言識  
者謂即淇園之竹其詩曰有斐君子如切如磋如  
琢如磨夫如切如磋道學也如琢如磨自脩也自  
脩之與道學何取於竹士龍家有老斲盍以是質  
之寶慶初元中和節古潛洪某記

此君軒記

軒舊麗寂照精舍東坡以倅行縣爲賦不可居無  
竹之詩隆興初徙于縣治衮繡堂之東開禧間嘗

重建寶慶初元避 上嫌名令桐江方侯熙易以  
此君仍用坡詩晉王徽之語也君者有德位之尊  
稱自萬乘至子男百里之國皆稱君以君名縣齋  
之竹其尊與君百里等然竹之君以德言百里之  
君以位言知君之所以爲德則優於君百里矣易  
之震爲專爲蕃鮮爲蒼筤竹其於時爲春春物之  
生專而蕃鮮莫竹若孤根峭植不數歲被山而雲  
戴角鬣栗曾幾崇朝已干霄而槩生意勃勃乎其  
不可禦故觀造物生生之德亦莫竹若也侯政成  
心休日與君對念吾民生齒之數能如君之蕃乎  
生養之具能如君之阜乎襁褓鞠育能如君日夜

所息與沆瀣俱升黃髮婆娑能如君什伍相依少  
長相扶老歲月飽風霜而無蕉萃之色乎以君之  
生觀民之生侯於此不徒名也吁人未哺吾不可  
以獨飫人方臞吾不可以獨腴對此大嚼奚心哉  
說詩者以意逆志可也紹定元年正月日里人洪  
某記

善圃記

余官太少時被檄行青城道上夏氣淑清空無點  
雲西望群巘嶢碧雪山出其顛霽霏留滋朝陽映  
明濯濯如白夫渠擢立萬葉間可攬也入山秀蔚  
而邃古與廬阜琅琊相上下宿丈人觀規犁明登



平齋集九  
儲福挹三十六峯之勝雨不果迄今旁午于懷一  
夕新崇寧丞楊君平叔過余玉泉山麓自言先吏  
部墓距峯七八里而近現真馬溪兩山夾峙小溪  
中貫竝溪原谷曠平宜耕鑿因廬焉屋後竹可二  
十畝左右阜壤鱗屬葺爲小圃樓溪山爲我有入  
圃畦蔬環小莊曰壠畝世田可耕也稍行結屋三  
間曰讀書處世書可讀也又稍行渚淪漪爲蓮沼  
亭其中曰君子讀書求爲君子也又稍行桃李與  
梅錯植小亭曰託根耻獨爲君子也出與世接和  
則易流屋簷當深處曰節堂直哉清矣清易至於  
隘必輔以通循曲水闢徑曰通蹊蹊盡海棠數十

本堂曰天富貴修其天爵非以要人爵也少折着  
亭柳陰曰早歸來達當知止窮亦不失歸根復命  
之理也能如是然後不遺臭於世築臺叢桂旁曰  
垂芳以厚終也最而名之曰善圃志獨善兼善之  
義巧爲我發之余方夢想西山聞君占勝其下喜  
如從步屨於煙畦露徑間回簷衆峯之倚寒碧燭  
向跋不覺膝之促因爲言易九卦示所以善其身  
十三卦示所以善天下天下者身之推也善天下  
之難未若善其身之難故於九卦反覆致意尤深  
君躬耕力書汲汲君子之歸羣而思立介而思通  
進而思反一朝夕而思百世知嚮乎明善誠身之

學矣然非名之求之貴而實之踐之貴非修之終身之爲多而敗之斯須之爲不少日用飲食之細家人唯諾之常暗室屋漏之密所謂獨善者在是而兼善者亦在是夫豈可以異言哉吏部公蚤以文墨表西南入爲名郎權臣曲意鉤致正色卻之其於善身善天下之要體認熟矣而推行未究也君能於著存之頃循而進之使充實輝光衣被丘園花竹魚鳥生意相續九原之眉信矣平叔竦然拱立曰敢不勉請書以爲圖記歸而刻諸石紹定四年春正月甲午錢唐洪某記

東山婆娑巖壑記

婆娑巖壑者何鄉先生吏部俞公讀書處也天目下趨于臨安穹爲雙徑奧爲大滌洞崛竒明邃爲九僊玲瓏及東西永安山其鍾爲人物唐季光啓中錢武肅始以功名著越百二十餘年有郎工部出又百七十餘年有公卓犖相望爲名法從山川英靈之氣大氏屯固蒙鬱蓄極而後發夫豈易然也哉公家西市距東山里所少時屏人事窮年藏脩山中學成一舉冠天下後每解官還里輒抱書山房繹其業講索益精詣益深論著益雄古四方秀艾樞請屨滿緇徒可與語亦泊然與爲莫逆交軒宇佳處丐一語品題未嘗不笑領也公即世忽

忽二十年僧老死且盡獨主塔了仁應門業淨趣  
明澹寂如止水撫風物之蕭疏愴者舊之凋落以  
公平生最愛環翠之勝因葺閣下爲堂以祠公擿  
疇昔所賦名之且悉疏詩文于壁林巘蔽虧花竹  
深映與窳堵相近遠儼猶昔也公儻騎雲馭風挾  
僊人左元放之徒忽去倏來乎夫出處之義大矣  
靜者常得之良爲山主靜而動靜不失其時其道  
光明雖動未嘗不靜也公方昌羊空谷燕坐而山  
月上長嘯而林華墮閉風霆閣雲雨人莫窺其涖  
及出而施之詩書仁義之澤滂葩淋漓而春萬象  
風節所存殆有駭濤怒颶日夜春撞所不能搖者

身在禁闥乃心清泉白石間蓋處亦靜出亦靜也  
綸巾一壑目擊道存山顧不重耶晉謝太傅高卧  
是山石室濬谷之趣自謂伯夷何遠悠悠千古此  
意惟公識之故併圖其像以慰山靈之思云門人  
洪某記

### 餘杭重建縣治記

餘杭茗雪之津會故冬予奉老親行雪上諸山扁  
舟循茗谿而下間登岸從牧翁漁媪語人人夸誦  
吾今年方壯而識老政出清靜民曾不省有官府  
也因以野服謁訂所聞令肅客于丞舍起訊之故  
曰縣治舊占溪南後徙于北宣和焚於睦寇江令

平齋集九  
十五  
衮重建建炎焚於金寇張令永嗣又建閱年百餘  
浸淫穿蠹凜乎欲壓圖撤而新之治寺吏民之耳  
目非他役比故不敢不勉予退而心念是邑近在  
畿內地望非不枵然大也而土薄水淺十日晴則  
告乾三日雨已相戒為溢備民以故亡蓋藏而令  
以負租督過者十七八彼莛于是豈漠無壓焉之  
懼哉所壓有急於屋者也見大夫以朝士來寧久  
此苟可撐扶以了歲月何新為新之寧不勤其民  
而自為紛紜耶未信潰于成也越數月茗人過予  
門曰縣寺成矣治事之廳退食之堂宴息之室崇  
楹邃闥表裏中度發地得中雷遺跡位置面勢且

還其初矣屋後惡木冗莽鴟梟狐狸嘯醜舞恠之  
地薙翦不留餘拓圃結亭松竹伍伍氣象一新矣  
而田里晏然罔聞知嗟夫縣無劇易視令為劇易  
弱者以苟偷為安皇恤我後強者惟力是矜一役  
之興萬感之乘也於此能於政休俗暇儲材庸力  
以植壞起仆使吏治尊民簷聳而一毫不以勤其  
民至斤圭田再歲之入以食功可表也已惟昔聖  
賢道化之盛有本末而無內外其用力自相在爾  
室始蓋萬室之治不如一室之難也言偃宰武城  
澹臺滅明非公事未嘗至其室是室之嚴所親必  
直諒所講必正大所踐必誠敬設辭詭行姦聲亂

色無一得以搖吾之清明而弦歌之化行矣令其  
進於是乎役起正月己未訖五月癸丑大尹詳定  
戶部侍郎余公佐其費爲多令公族名希磐以進  
士試刑法中其科嘗爲大理評事云紹定癸巳秋  
七月甲子潛山洪某記

鎮江府學田記

三代學校與井田相表裏量地以制邑度地以居  
民食足事時安居而樂業然後興學養在教先也  
然比閭族黨聯合保受而教與養已並行五家之  
比積而至於二十五家之間門側必有塾衆庶所  
聚以里居之有道德者爲之師是入於塾而學也

春將出民里胥坐於右塾隣長坐於左塾畢出然  
後歸是出於塾而耕也出於塾而耕則周旋乎同  
井之田入於塾而學則薰浹乎同門之訓養之所  
至教亦至焉初未嘗去里巷違父兄以爲學而人  
人有士君子之噐自塾升之黨庠遂序國學官而  
祿之不勝用矣王道衰井田壞學校日廢漢除秦  
禁士始散出以求師自是經生學士傳業寢蕃大  
師衆至千餘人博士弟子員之外未知何以爲養  
東漢儒學益盛精廬所建羸糧動以千百耆名高  
義開門受徒著錄每不下萬人蓋人自養而自學  
矣士生三代之時教且養一出於上生三代之後

平齋集卷九  
九  
迺自養而自學是後世之爲士難於古無恠乎人材道化之不古也 國朝以崇儒右文爲一道德同風俗之本上自太學下至郡縣學莫不教且養田不井授而庠序之盛不減三代故其養爲難京口郡學之田在金壇湖澤間爲多經界行於潦浸之後以茭葑地定租晦出錢僅二十餘歲又茭葑爲膏腴而租猶故官沙諸莊在江渚者又日淤於潮以故食常患於不續歲己丑今兵部侍郎趙公范爲守有以金壇田告者檄官核其入每晦俾量出斗租以澹士事未竟會邊遽移鎮維揚而軍器監丞韓公大倫實來視校官陔圮首經葺之民間

風欣然願輸大約山土田以晦計一萬五千一百有奇歲增米以石計九百二十錢以婚計九百五十四於是廩有繼粟而寢處有筦簞几席之安沙田之可捍築者亦次第集事郡文學羅君閻慮異時勢攘力劫乾沒詆調之無以爲久請記之孟子曰無常產而有常心唯士爲然士之異於凡民者以是心不爲飢渴害也然非講學不足以窮理非窮理不足以知命非知命不足以養心夫繫於天而無所用吾力者命也循乎天而無往不惟天之聽者所以致其命也吾知脩吾身行吾義而死亡禍福之在天者一不與知命自我而立也以此處

貧賤雖祿萬鍾食方丈不足以易吾簞瓢之樂所  
養豈不浩然矣乎而職於養人者不當以是論羣  
吾民之秀於學欲使鳶飛魚躍於作成之下以長  
治其民而壽吾國顧未免養之有不澹焉而曰士  
有常心不爲飢渴害也其可哉然則二公封植學  
校之意學者不可不承來者不可不嗣也

平齋文集卷第九

平齋文集卷第十

序

楚泮榮登義約序

禮賓周制續食漢法士未嘗爲春糧之謀科舉設  
而待士之意衰薦名春官至有貧不能行者亦有  
妻上而索其家者遠方皆病之番江去武林餘千  
里歲當大比相與哀金俟同盟薦送之多寡均以  
給費嗟乎床頭金盡壯士失色囊無一錢羞澁萬  
態彼蓋未知道者吾儒讀書萬卷可敵猗頓之富  
何至預以行橐不充爲憂是舉以義爲勸亦唯相  
期於功名之會而已然義利相去不能以寸而趨

舍有舜跖之分平時燈窓議論務以道義相磨礱  
至利害迫之小則賣友大則賣國視所學爲芻狗  
者多矣諸君聯翩青雲致身富貴其毋忘齏鹽時  
後車十乘從者數百其毋忘聚糧時一貴一賤升  
沉不齊其毋忘同盟時能守是約斯可謂義皆曰  
能遂輟萬錢爲之倡嘉定三年正月望日錢塘洪  
某序

送何龔父序

夏至後三日龔父歸閩訪予以別飲之酒且告之  
曰君子之學進於靜爲難靜者誠之復性之貞也  
聖人定之以中正仁義而主靜學聖人者必以靜

養夫中正仁義之所自出蓋人生本靜物交物引  
之則靜者動動而無以制之愛惡情僞互相感觸  
則橫流而忘返靜所以制夫動也而靜之功非可  
以驟進朝省夕察日磨月鍊用力於惟危之地如  
馭駢馬如防潰隄如治百萬之師使志足以帥氣  
而氣不爲非義餒在我者立在物者靡慾心平而  
躁心釋靜之功進矣靜進則內體純固而清明廣  
大生焉清明則天地萬物之理皆會於吾誠廣大  
則方寸之運天地萬物皆爲吾用而道在是矣易  
六十四卦乾坤之外其本體以道言者惟復與艮  
復之動隱於至靜之中故曰反復其道艮之靜立



於羣動之表故曰其道光明道未有不自靜入者也參之魯良顏子之如愚復聖門之正傳以此龔父資簡茂近於靜其入道爲易澄心以觀我平心以觀物一敬主內萬想不搖山光凝而白雲度野水空而庭草碧悠然意得表裏俱融所到詎可尋尺計哉予方習矣弗察乃以告吾子它山之石可以爲錯朋友講切之義也龔父勉之異日將於是乎觀所進

於潛洪氏譜系圖序

洪姓有兩出一避唐孝敬帝及本朝宣祖諱易弘爲洪一伏羲神農間共工以水德伯九州其子

勾龍爲后土後裔封於共爲共氏漢末避仇益水爲洪吾宗共伯之胄也聚族天目下以東洪名其村無慮六七十家耆舊相傳始祖自四明挈家奉母來今西莊下擔墓猶亡恙每歲除家祀所謂渡江祖席地用古禮而所徙歲月漫不可考然自始祖至于今不翅十五六世一世三十年當是唐中葉徙居於潛谷口矣洪望煬煌郡其散見於纂記多占籍東南吳廬江太守矩宣城人唐集賢學士孝昌舒城人翰林學士侃仕南漢參知政事昌杲仕南唐昇元宗譜一侍御三尚書則鄱陽三洪之遠祖也得姓以來鄱陽爲鼎盛而在潛之洪四五

百年間種德執善源深流長曾未有顯者豈聞崖  
僊之風以肥遯爲高歟抑名山大川英淑之氣有  
待而發蓄雲閉霆然後大沛厥施歟紹興己酉裔  
孫珏首考世系派別爲圖藏于家其後斌又采之  
爲祖宗諱第圖訖于己卯去今六十八年支葉益  
蕃不可無紀余自郎曹罷歸地偏日永因彙粹而  
續之九力田以肥家從戎以世宦讀書爲文以名  
場屋皆倉監公長子仁朗之傳吾所祖也故詳仁  
蘊之後數傳而遂微故老不存舊聞放失未免間  
闕文以俟質訪夫能言其祖郊子見師不識其先  
籍談取諂肖貌于兩間者不可不知世繫之所自

出知所自出則知根幹華葉同此一氣自葉流根  
不容間斷春秋烝嘗以序昭穆而謹終追遠之意  
存歲時會聚以親族黨而乖爭陵犯之風息朝夕  
講磨修飭求爲善人君子之歸而無忝於爾祖此  
圖蓋亦風教之助云寶慶丙戌六月庚寅十五世  
孫某序

豫章外集詩注序

天降時雨山川出雲故嵩高烝民之詠不于人物  
之盛而于其生我 列聖以人文陶天下學問議  
論文章之士莫盛於熙豐元紹間其生也類在  
神文朝如詩家曰蘇黃曰黃陳蘇公生於景祐陳

公生於皇祐而豫章生於慶曆天地清寧日月正  
明稟於氣者全也公得清寧正明之全氣氣全而  
神王挾豐隆騎倒景飄飄乎與造物者游放爲篇  
章超軼絕塵獨立萬物之表坡翁蓋心服之而後  
山師焉其集嘗擬莊子分內外篇外集如韓淮陰  
驅市人背水而戰暗與兵法合內集如諸葛武侯  
八陣竒正相生鬼神莫窺其奧彙分之意嚴矣君  
子之學日進而日新日新而日化進則人新則道  
化則天逝者如斯不舍晝夜正以是也文與詩亦  
然論詩者不泝其始無以知其進而新不極其終  
無以知其新而化內集斷自入館以後極其終矣

外集起初年溪上吟泝其始也眉山任處士驥天  
成擺落科舉之累真積於學書無不覽愛公詩若  
嗜欲然以內集有任子淵注因注外集十二卷攷  
年譜以推出處用事必求其意用字必探其原勤  
且博至矣或以詩嘗經公手刪而疑其多愛然使  
學者盡見前輩少壯至老之作以觀日新日化之  
功雖多不厭也子逢博習有家法方注詩時兩髦  
耿耿檢書捧研領退而學詩之意今以名卿守蜀  
白首矣懼父書無傳力自讎校鋟而公諸世萬里  
信來俾序之某晚出未闖其樊何敢贅樓攻媿謂  
宋宗儒摘阮歌戴道士彈琴詩不知何以分內外

當有能辨之者余聞李衛公好惠山泉置驛取水  
有僧言長安昊天觀井水與惠山泉通雜它水十  
餘缶試之僧指其二曰此惠山泉也文饒爲罷水  
驛欲知內外之辨者請以是觀之

### 桂巖雙蓮圖序

西風入簷涼蒲中席紫水何君噐之以嘉蓮圖來  
示云大兒自任舍桂巖沼中所產也前是庭砌嘗  
長異篁今復有此鄉之耆耄雋艾相與夸詠以爲  
瑞懼弗克當也子以爲何如余撫圖太息言曰深  
哉造物之意也鳴鳩在桑其子七兮淑人君子其  
儀一兮鳴鳩之哺其子朝從上而下暮從下而上

均平如一君以義方名家以厚德燕後男子子四  
叔仲季連著聲科級而伯未也伯有子亦復蘄然  
露穎於場屋派義方之澤蔓厚德之慶猶鳴鳩晚  
哺已徧於下方進而上及固有開必先乎夫英華  
者和順之發也馨香者忠信之達也充實輝光者  
善美之形見呈露不可遏者也君觀是華根培而  
榦擢歧芳而趾榮天理人事之相爲符昭昭也惟  
無必其在天而後知天之可必也年月日序

### 春秋說序

帝王誥命訖於平王國風變於黍離聖人傷王者  
之不作因魯史修春秋以奉天命而立人極夫天

命流行於人極之中無一息間斷人惟不知吾心  
有天而外求天謂吉凶禍福天未嘗定往往無天  
而動於惡然天雖有時而未定終必有時而定天  
者定則人者屈此人極之所由立也此春秋成亂  
臣賊子所以懼也彼亂臣賊子惟利是計豈懼夫  
空言之貶身後之辱哉懼夫天者定而人者屈失  
其所以爲利也故凡犯天下之清議冒天下之大  
罪能違諸一時不能違諸異日能違諸其身不能  
違諸其子若孫人誰無愛身愛子孫之念知天定  
有不可違則欲動於惡將有所懼而戢此撥亂反  
正之筆所以有功於人極也且易春秋在魯皆所

以司天人之契人欲窮而天理滅其卦爲剝春秋  
二百四十二年純乎剝者也以齊威霸天下始末  
求之每四十年當一交陰愈進則亂愈甚盟宋之  
後晉以天下之權授之楚而大夫專盟諸侯皆廩  
廩乎贅旃之危五陰之剝成矣其末又以天下之  
權授之吳吳楚與越參立而交橫大夫各朶頤其  
國禍亂及矣而獲麟於西狩亂極必治安知無王  
者作此碩果不食剝所以不終於剝也春秋以傷  
王者不作而始以幸王者復作而終以魯聖賢之  
澤未泯一變可至道而託之以詔萬世天道至教  
聖人至德備見於行事斷斷乎循之則治違之則

亂得之則生失之則死信人極非春秋不立也余  
自考功罷歸杜門深省有感於聖人以天治人之  
意作春秋說

兩漢詔令序

天道不言而四時行聖人不言而萬化成言非感  
人悟物之本也審矣二帝之典三王之誥猶不能  
已於言誠在言前也言出於誠雖言而忘言漢世  
至誠之學不講皇極之訓蔑聞而一人志慮形爲  
播告大抵出於手製天下猶得以因其言知其意  
夫言之不文行之不遠渾渾灑灑王言之體也漢  
上接三代統緒其文猶有爾雅之遺人主天資有

高下躬行有純駁識量有廣狹政事有得失固不  
容槩論而以仁立國之意丁寧懇惻四百年猶一  
日至先主孔明之用蜀一時詔勅亦能使聞者爲  
之興起豈非兩漢之澤未斬歟孟子曰誦其詩讀  
其書不知其人可乎是以論其世也此書爲尚論  
其世作嘉定癸未冬甲子於潛洪某序

送程叔運掌之湖南序

秋風動容木葉欲下眉新進士叔運程君過我東  
山將歷沅湘而南征愀然買酒酌之曰香草佳木  
隨地皆產而莫盛於湘之南湘南衆芳所在杜衡  
江離芙蓉薜荔木蘭若芷荃蓀椒桂不可一二名

而莫盛於蘭蘭有國香人服媚之初不以進而榮  
其生深林無人自芳亦不以退而辱騷人所以反  
覆深致其意以其似道也故紉之爲佩折瓊枝以  
繼之而求襲其芳澤是芳發於身達於家漸於國  
以及乎天下薰蒸乎兩間流被乎百世曾何負於  
人哉而服艾者謂不可佩人心嗜好不同乃爾於  
蘭庸何悲委厥美以從俗而與惡草俱化則蘭之  
悲也然蕪沒於蕭艾之中可蔽其芳不可奪其芳  
故曰佩繽紛其繁飾兮芳菲菲其彌章又曰惟茲  
佩之可貴兮芳菲菲其難虧其根於天者蓋終始  
未嘗爲時俗流從所轉也蘭有數種有澤蘭有石

蘭有一榦一花之蘭或秀於春或專於夏而發榮  
沅湘者紫而尤馥見於秋爲正秋方僚慄慘悽萬  
卉溘然如戰敗無人色綠葉紫莖表表獨芳其可  
敬也夫坎維心亨困而不失其所亨此蘭之所以  
似道也君欲進乎道盍於蘭乎訪之且爲我歷訊  
衆芳無恙攬涕延佇未知九畹百晦之誰屬也

嬾窟詩藁序 錢積

祕丞樵李錢君子正與余好嘗從容論詩喜稱仲  
氏慶善賦詠得回谿老人之傳恨不及識也子正  
即世十有五六年其猶子巖友以嬾窟一編來曰  
願徵福于祕丞叔丐爲先君子發之余愴然追往

不能已因念詩亡而離騷作騷之憤世疾邪蓋出於小雅之變後世之詩又以出於騷爲近雅時觸乎所感事拂乎所遇託物引興以寄永憤紆餘窈眇激揚頓挫有不盡之思而詩工矣然皆變小雅流風之遺也知大雅廣哉熙熙乎之體幾何人哉慶善嘗爲長樂宰施不盡學其見於詩凡騷人感槩不平之氣憤鬱無聊之情一無有陶寫性分惟澹然樂易之歸江山之平遠風月之清明草木魚鳥之幽閒自適皆其神氣之動德符之充也廣大而靜疏達而信者宜歌大雅其必有會乎

### 題跋

#### 龍州免運糧夫碑跋

蜀自開禧佳兵以來調役婁矣龍之民獨共其二平時家出丁壯番上十關五寨以扼氐隴有警則以賦授役霜肝雷腹膚奔魚貫飛輓于關表間顧更厚征之其民重困有對而無告制置南海崔公都運合陽趙公聞而惻然曰不堪命矣嚴爾戍寬爾轉饟自今其勿與山窮水盡之邦刀耕火種之俗始有生意誠求之也詩曰民亦勞止汙可小息毋縱詭隨以謹罔極敢告諸來者嘉定甲申五月旦日



易齋詩藁跋

詩無定鵠會心是的仲可謫居二十年自放於詩多警策其賦梅有天不能寒獨有梅一涉春風不足竒之句讀之至此悵然久之曰其有分寒餓也耶余於此有會其亦有分寒餓也耶因書卷末

崔文昌書翰跋

為黎監丞伯登作

蜀輿鬼分野多鬼術辛巳

瑞慶節有日者自益

昌過少城竊詹菊坡老先生於大慈寺蒲散所退而謂某曰帥嶺南古佛西蜀福星也至節前後度劔即辭過崇寧謁德升曰賢大夫旦夕入益昌幕時宣閫猶無恙甚疑之已而至節後果度劔德升

尋入幕以縝栗緯恢博以簡靜翼方嚴從容論議如正志審固之鏃劃然而破的如躊躇四顧之刃諒然而中竅如鳴和鸞逐水曲之馭安然王良造父之手而六轡如舞也用能起久億之俗弭紛集之變而遂與同升賓主遇合固有數行乎其間乎夫以朝廷信臣由一路帥四路若可億揣莫府初開求士於叢英旅雋之中而數已先定人其可萌一毫券外之想乎因觀菊坡手帖有感敬書其後

俞拙庵偈語跋

士君子平生學力最可驗於啓手足之頃曳消搖之杖易華睨之簣蓋安之以為常而不以為異也

拙庵居士業儒好脩以拙自喜拙則靜靜則平平則澄而明理明志定不爲氣所動故能無怛化病革家人環泣撫勿泣命子德藻滌研濡筆手書四句偈以訣神宇凝正鉤畫勁峭實踐素履絃攝呈露坦然以方寸遺子孫非學力之驗耶至此然後知斲弄精光於百巧者之不如拙

陶同年崇詩卷跋

某與宗山同壬戌進士甲申冬同除祕書郎迓之江上投分日密乙酉秋某去脩門未幾宗山亦去時上方鄉用舊學何落落獨爾耶宋廣平賦梅花疑非鐵石心腸人海棠詩近之矣九原莫起撫

卷潜然

彭忠毅謚勅跋 爲董景揚作

紹興間顏邵以其祖魯公所自書告進上曰人皆有一死或輕於鴻毛或重於太山處死爲難耳忠毅彭公亦善處死者也守衢日方臘陷歛睦杭衢介于三郡賊勢張甚獨與郡僚段處約守城城陷罵賊以死有殺身以成仁公之謂矣公伯氏尚書元祐紹聖正人壻余御史亦以直聲聞天下一門氣節相尚輝映千古景揚公曾孫壻得吳傳朋所書謚勅於其家故篋猥釀中寶之如天球珙璧其知所尚哉年月日某敬觀于朱陀聞復閣

家朝南避偽回任檄跋

開禧丁卯之變蜀士有死之以爲忠者有去之以爲義者各行其志也吾朝南其去之以爲義者歟夫死生命也去就義也惟其委死生於天而後能全去就於人易曰君子以致命遂志朝南以之

徽廟草書千文跋

臣恭惟 徽宗皇帝聖學天縱批糠姚姒萬幾餘閑遊戲翰墨元氣淋漓不擇地而施梁周興嗣所次千文遂被異世非常之遇 高宗皇帝中興江左志在復古 列聖雲章奎畫厚募歸之東序每得宣和宸藻輒悲不自勝以故左璫慮傷 上意

多抑不進此文其一也龍騰電掣出入造化躡繇轢羲前無千古甲丁護持劫燼不壞凡十有六紙悉以交龍篆章券其縫臣子述博古識真恭禱而寶襲之一日出以示臣臣聞紹興間 上知懷素千文藏董弁家命朱勝非諭指投進使此書得陳乙覽豈復求驚於野乎感歎之餘謹拜手稽首志其末寶慶初元寒食日臣洪某

高廟千文跋

經乾緯坤者典學之全功出聖入神者游藝之餘事臣恭惟 高宗皇帝斷鰲立極息馬論道緝熙光明之學追媿三五倬彼雲漢敷賁石經龍畫螺

書旁分徧刻莫不大關造化細及庶務垂則于億萬世千文特凡將下陳何與大學姍姍餘閑亦復肆筆及之臣子述所藏臨智永書識以彭城瑤暉奉華印章劉望彭城或謂當時劉貴妃所得好賜楷法道潤草聖妍力神動天隨超絕衆妙視永所書可謂集厥大成金聲而玉振之矣我太宗皇帝嘗行草千文賜李至至請鏡諸石以詔方來上曰梁武得鍾繇破碑俾周興嗣次韻非垂世立教之道孝經百行之本朕當親書觀 思陵奎藻者當以 熙陵之意參之寶慶改元清明後一日臣洪某九頓首謹記

程剛愍死事跋

死生命也處死生義也義所當死直死耳君子不苟免而生也身不苟免而生乃所以生社稷也天寶之禍唐以顏李張許之死而生靖康之禍吾宋以傅李梅陳程安諸賢之死而生皆功在社稷者也嗚呼安有功在社稷如剛愍而其後莫之錄乎端平初元立夏後兩日古潛洪某

題洪崖圖

洪崖三皇時有道之士其見於隋唐間者曰張氲或曰蘊自號洪崖先生出入以髯髻五雪驢一自隨此圖是也吳興葉子淵得晁氏所藏龍眠本手

臨以見遺老人戲題云先生固清高弄拙反成巧  
一人御六子終被雪兒炒此畫此詩俱有眼也猶  
子穰弦誦之暇取所畫臨之一發輒破的老睫爲  
明因識其末紹定癸巳立秋日

題西岳降獵圖

君玉以官車遊獵圖二寄示共七紙韞箘前驅嬪  
御紛從來輿去馬蹴踏雲氣其精妙瑰恠縱橫變  
化出天入神嘆非龍眠莫能作而不能名之轉似  
都官隆山李成之曰西岳降獵圖也吾家絹本得  
之康節孫邵公濟家人物部分與此無一不合獨  
第七節前多馬上美人四因合二圖爲一次第其

先後以復得非兩家所藏同出一時之筆紙其創  
絹其成歟絹壽止五百年紙壽千年君玉倒黃河  
以洗研挹玉井以濡翰醉攬風露吸金天之晶而  
賦之必有與此畫相爲壽者紹定癸巳立秋日於  
潛洪某舜俞書于繡山堂

題天台聲聞十八尊者像

余庚午初夏與會稽王仲鈞同遊廬山旬餘一夕  
仲鈞先還南康城余獨宿開元寺軒窻靜深毛骨  
灑然夜半夢至佛殿前遇長身僧握余手而言堯  
曰數句已斷於篇章之末參乎一唯獨得於言意  
之外孔子子思相傳者如是吾佛亦如之孟子不

足與語此言訖而覺林月滿庭水泠泠如琴筑因  
起坐不復寐晨粥舉似衲子無能會但以山中古  
佛示現爲對轉首二紀矣臨安東山淨空出天台  
聲聞十八尊者像乞一轉語恍然有感追前夢書  
之聲聞領此必有超悟於文字語言之表者

范丞相謝表跋

慶曆中 仁宗以中外人望用韓范富共政責治  
於期月間遇合之盛如此一朝欲止僥倖退不肖  
而小人始側目相繼去位高平公受知 高廟前  
無與比至重惜名器裁抑苟得亦罷相於紹興初  
直道之難行雖盛世猶不免可勝歎哉端平丙申

正月十一日於潛洪某書

劉忠肅尚書右丞告跋

挫士氣者沽激之名壞國是者調亭之論忠肅公  
在元祐初以呂正獻薦爲侍御史進御史中丞又  
以正獻薦擢尚書右丞方在臺時彈奏蔡確章亨  
呂惠卿安燾等靡遺餘力第知去大姦大佞以扶  
植更化之盛不暇計它日之禍也使公計它日之  
禍則必以無所是非可否避沽激之名開調亭之  
論局面隨手變更奚待閱八年而後爲紹聖哉雖  
然無鮑叔則無管仲無子皮則無子產無正獻則  
安有忠肅觀此告者當有感丙申春社日於潛洪

某敬題于摘文堂

劉忠肅冗費官制擬草跋

前兩項寶元嘉祐詳定減省冗費似是進故事之類後兩項元豐頒行官制拍揮必公爲右司郎中時代宰臣擬進續通鑑於覈正吏治條曰詔於創被差命條曰上批其間頗有刪改處大意皆如所擬年月與此合 神宗聖訓左右司須是學爲宰相良有以夫

劉忠肅遺龔輔之手啓跋

公時爲校書郎

公用韓魏公薦自江陵府觀察推官除祕閣校勘初入朝時帖也尊諫院以先生犬犬首番用名印

於月次番用於名皆近世所罕見

觀劉忠肅手簡

嘉定甲申某與公曾孫爲龍州交承端平乙未丙申又獲與公元孫今太常寺主簿同朝常簿論事挺挺有祖風烈可敬也出示此軸敬書其後

題劉忠肅和洗竹詩帖

洗竹和篇與白樂天養竹記同意闢邪衛正嚴矣異時罷相乃出於所善之楊畏何蒼翳託根之深耶

觀劉忠肅所書金剛經

此必非在臺省時所書閑退中移心法耳

書諸公贈鍼醫李立之十全堂詩文後  
真西山病革吳義夫自江西津致立之視之曰鍼  
有起死功未至之數日西山隕嗚呼天胡奪斯人  
之亟耶豈二賢畏立之之至迫之殆耶抑立之有  
天幸鍼不及施於決不可起之疾得以全其術耶  
余得竒疾於上齟逾年累更醫不効立之視之曰  
鍼艾所不及也知其不可治而不治是亦全已江  
湖間恐有異人竒士能以竒方治竒疾試爲訪之  
幸得其方以寄是又不自居其全而能進於全歟  
古潛洪某舜俞

書天竺杲古鏡住持箴

此古鏡磨鏡法也以後光明透徹自無待磨諸禪  
莫被老行者熱瞞道不須拂拭古潛洪舜俞

平齋文集卷第十





